

淡

墨

錄

一



淡

墨

錄

一

李調元著

中華書局

淡

墨

錄

二

李調元 著

中華書局

叢書集成初編

淡 墨 錄 二冊

中 華 書 局 出 版 發 行

(北京王府井大街三十六號)

秦 皇 島 市 資 料 印 刷 廠 印 刷

一 九 八 五 年 北 京 新 一 版

開 本：七 八 七 乘 一 〇 九 二 毫 米 三 十 二 分 之 一

統 一 書 號： 一 七 〇 一 八 · 一 五 一

序

淡墨錄者。所紀皆本朝甲乙兩榜諸名臣之言行也。余舊有人物總志百卷。篇帙浩繁。故先摘其要者以問世。大抵皆翰苑之名言。科場之條例。兼徵軼事。並述奇聞。自國初起。每科俱按題名碑錄。科分前後。而康熙己未。乾隆丙辰。兩舉博學鴻詞。得人尤盛。亦併逐一搜羅。詳爲考釋。編成共得十六卷。禮曰。史載筆士載言。余非敢然也。聖人有言。賢者識其大者。不賢者識其小者。遭逢聖世。賢良輩出。多千載罕見之曠典。未有之奇逢。不有紀錄。何由窺其原委。悉其廣大。夫是故老將至而猶不忘記載也。夫述而不作。雖聖人且然。況下焉者乎。故此編欽遵綸書。謹依功令。抽中秘之書。採故老之傳。不但備詞林典故。聊以續玉堂嘉話云爾。則閱者以此爲言行錄也可。以此爲則例編也可。至淡墨書榜。不知始自何時。或云。唐李程應舉時。遇天榜吏。問登第人姓。則有李和。而無李程。蒼皇求之。乃用淡墨筆添王字於和字之下。果得第。後遂相因。凡榜書人名。俱用淡墨。遂成故事。又賈公談錄。唐李紳侍郎知貢舉。夜放榜。書未畢。書吏忽得暴疾。因更呼一善書吏代。吏方醉。磨墨鹵莽。一榜字或濃或淡。致其妍。二者未知孰是。云。乾隆乙卯初冬上浣。綿州雨村居士李調元撰。

淡墨錄卷一

蜀綿 李調元 雨村

國初館閣官制

天聰初年設立文館十年改文館爲內三院一國史院二秘書院三宏文院各設大學士一員學士一員崇德元年以剛林領國史院大學士范文程領秘書院大學士希福領宏文院大學士學士以羅碩詹霸胡球分領之順治十五年九月改內三院爲殿閣一中和殿二保和殿三文華殿四武英殿五文淵閣六內閣十六年年初以覺羅巴納哈爲中和殿大學士額色赫爲保和殿大學士蔣赫德爲文華殿大學士洪承疇爲武英殿大學士文淵內閣未補人裁三院學士官另設翰林院掌院學士一員以折庫納爲之十八年七月復改殿閣爲內三院仍設學士裁內三院其六月以前與十七年同康熙九年復改內三院爲殿閣復設翰林院

翰林所掌

大清會典翰林官員職在侍從禁庭進直講筵記注起居撰擬冊誥等文纂修國史諸書順治元年置翰林院爲正三品衙門設漢學士一員侍讀學士侍講學士各二員侍讀侍講各二員修撰編修檢討庶吉士俱無定員典籍二員孔目一員二年裁翰林院以翰林官分屬內三院十五年復置翰林院設滿漢掌

院學士各一員兼禮部侍郎銜漢侍讀學士侍講學士各三員漢侍讀侍講各三員修撰編修檢討庶吉士俱無定員滿漢典籍各一員滿侍詔四員漢侍詔二員滿漢孔目各一員滿文筆帖式八員滿漢文筆帖式八員十八年復裁翰林院康熙九年仍置翰林院員額與順治十五年同增設滿侍讀學士侍講學士侍讀侍講各三員裁滿侍詔二員增設文筆帖式八員漢軍筆帖式八員十一年增設滿文筆帖式十四員滿漢文筆帖式十員

本朝開科舉人

天聰八年四月太宗文皇帝命禮部考取通滿洲蒙古漢書文義者爲舉人取中滿洲習滿書者剛林敦多惠滿洲習漢書者察不害恩國泰漢人習滿書者宜成格漢人習漢書者齊國儒朱燦然羅繡錦梁正大雷興馬國柱金柱王來用蒙古習蒙古書者俄博特石岱蘇魯本共十六人俱賜爲舉人各賜衣一襲免四丁晏於禮部崇德三年八月賜新中式舉人羅碩常孫胡邱阿濟格畢禮克圖王文奎蘇宏祖楊方興曹京張大任于變龍等十名朝衣各一領授半箇牛永章京品級各免人丁四名六年六月內三院大學士范文程希福剛林等奏以滿漢蒙古士人考取秀才並舉人秋七月賜新中式舉人滿洲鄂貌圖赫德蒙古杜當漢人崔光前卞三元章于天卞爲鳳各綴朝衣一領當是時取士之額雖少而名臣多出其中

滿洲科目解元

賽圖字麟閣滿洲科目解元幼而貧常燕馬通讀書尤好爲詩滿洲文學之開實自公始而滿洲文字則創于達海公特諡文成云

沈文奎爲盛京開科進士

本朝太祖肇造丕基太宗用范文程議特選於盛京沈文奎登第一名爲進士開科之始盛京志文奎字清遠本浙江會稽人世居曹娥村少習舉子業小試不遇客遊遵化值大兵破城挾之行遇太宗登第一充秘書院纂修官順治元年扈從入關上命巡撫畿南又命總督漕務時當初定江淮多伏莽文奎綏來有方民甚賴之自客遊至此與母妻相隔十八年拜疏迎養骨肉復完擢宏文院學士充會試副總裁丁艱再督漕時膠州將海時行叛率先會勦督兵部尙書于蔭以白糧愆期鍰級爲陝西糧儲參政乞休卒年五十七紹興府志是本朝進士開科第一人實自沈文奎始

丙戌丁亥再行會試

范文程本朝開國元勳文臣第一人也字憲斗號輝嶽漢軍鑲黃旗人朱仲淹後由江西樂平遷藩陽曾祖鏞明進士累官兵部尙書以忤直忤嚴嵩去祖沉爲藩陽衛指揮同知父楠生子二文程其次也少穎敏沉毅讀書輒通大義年十八與兄文桀並爲生員天命三年大兵克撫順文程偕兄來歸太祖偉其貌詢知其家世願謂諸貝勒曰此名臣後也善遇之天聰三年以文館官從太宗征明有功是時文館內尙未有大學士職銜而文臣所領皆樞密事每入對必漏下數十刻始出或未及食慰復奉召入率以爲常

崇德元年改六館爲內三院。特授文程秘書院大學士。每議大政。必資籌畫。宣諭各國勅書。皆出文程手。三年更定部院官制。奏請各衙門只宜設滿洲承政一員。以下酌量設左右參政。理事官。副理事官。額者庫各官。共爲五等。八年始撥文程隸鑲黃旗。是歲世祖章皇帝嗣位。明年爲順治元年。四月闖賊陷明北京。明山海關總兵吳三桂來乞師。遂驛召文程於蓋洲之湯泉。決策進兵。時文程方抱病。力疾趨盛京。建議曰。自闖寇猖狂。中原塗炭。近且傾覆京師。戕厥君后。此必討之賊也。雖擁衆百萬。橫行無憚。揆其敗道有三。逼殞其主。天怒矣。刑辱縉紳。拷劫財貨。士忿矣。掠民貲。淫人婦。火人廬舍。民恨矣。備此三敗。行之以驕。可一戰破也。我國家上下同心。兵甲選練。誠聲罪以臨之。恤其士夫。拯厥黎庶。兵以義動。何功不成。復言好生者。天之德也。兵者。聖人不得已而用之。自古未有嗜殺而得天下者。國家止欲帝關東。當攻掠兼施。倘思統一區夏。非又安百姓不可。於是大軍遂發。文程扶病隨征。申嚴紀律。妄殺者有罪。二十二日敗流賊兵二十萬於山海關。我兵長驅而西。民多逃匿。文程爲草檄宣諭。言義兵之來。爲我等復君父仇。非殺百姓也。今所誅者。惟闖賊。官來歸者。復其官。民來歸者。復其業。必不汝害。民心遂安。凡檄皆署文程官。階姓氏。師入燕京。文程建議。首先爲明愍帝發喪。易梓宮。備儀衛。文程親紀其事。中原既定。上疏言治天下。在得民心。士爲秀民。士心得。則民心得矣。今宜廣其途。以蒐之。乙酉丙戌。通籍者皆江北士。請於丙戌丁亥。再行鄉會試。於是江以南士子畢集。得人稱極盛焉。康熙元年。祭太宗陵。伏地號慟。幾不能起。五年八月初二日卒。賜葬紅螺山。御製碑文。額於墓道。諡曰文肅。見八旗通志。

丙戌北京首科狀元

國朝定鼎燕京。順治三年丙戌。爲龍飛首科。狀元傅以漸。山東聊城人。授修撰。官至大學士。榜眼呂繼祖。直隸滄州人。授編修。官至侍講學士。探花李襲棠。大興人。又會元也。授編修。官至司業。是科會試首題。百姓足。君孰與不足。百姓不足。君孰與足。次見而民莫不悅。三王道之始也。元墨渾穆。蔚然開國氣象。時三藩未定。故無邊五省人。而國初諸大老。皆出此科。如蔚州魏果毅公象樞。字環極。立廟清慎。爲本朝理學之宗。栢鄉魏文毅公裔介。字石生。贊襄恪勤。尤能博綜經史。高陽李文勤公。字景書。風度端凝。老成持重。朝野倚以爲重。國初大典禮。皆出其手。尤精字學。嘗謂古無查字。作察核解者。查者。察之轉也。今票本及文移。俱用查字。不典。奏明請將查字盡改察字。從之。是皆庶吉士至大學士者也。

丙辰補選前明庶吉士

順治內辰。補選前明庶吉士七人。王崇簡。順天宛平人。杜芳。直隸長垣人。周爰訪。山東寧陽人。張丕吉。山東嘉祥人。魏天賞。河南遂平人。喬庭桂。山西解州人。岳映斗。陝西三原人。皆崇禎癸未進士。

丙戌得人最盛

順治丙戌首科。得人最盛。大拜四人。傅聊城以漸。李文勤。魏栢鄉裔介。丙戌會試。丁亥殿試。馮文毅。尙書八人。沙宗伯澄。高司寇景。傅司空維麟。冀司空如錫。朱司空之弼。艾司寇元徵。魏敏果象樞。劉端敏樵。督撫尙書三人。袁清獻懋功。朱河督之錫。林漕督起龍。左督御史一人。劉邇安鴻儒。侍郎十五人。李宗伯

苑棠石司農闕張司寇爾素陳司農協王司空天眷胡少宰兆龍梁少宰清寬梁少宰清遠田司農六善楊司馬時薦于司寇嗣登朱司農裴李司馬棠馥楊司空運昌王司農度左副都御史一人董洛陽篤行巡撫右副都御史一人張閩撫河通政使二人晉洪洞淑軾劉羅山士蘭大理卿一人王文安景祚本名胤祚內院學士一人夏蓋九數九

詞臣出爲監司之始

藍潤字鳧渚卽墨人順治二年丙戌進士由庶吉士至侍讀榜本名滋至是特賜名潤性廉介不異儒素故事直隸江南皆以臺員視學上特簡詞臣以潤爲上江學使盡剔積弊世祖每顧廷臣曰居官如藍潤可法也會直省監司多不稱上以翰林官習治法度以潤品行清端遂出爲福建參政督糧儲尋遷布政使落職嗣後詞臣出爲監司皆相繼召用惜潤已前卒

探花爲僧

順治四年丁亥鼎甲狀元呂宮字長音武進人官至宏文院大學士榜眼程芳朝字其梧桐城人官至太常寺卿探花蔣超字虎臣金壇人以編修督順天學政事竣卽告歸不過里門沂巴峽至峨眉山寓伏虎寺于癸丑正月端坐說偈而逝偈曰由來猿鶴自相親老衲無端墮孽塵妄想鑊來避熱却從大海去翻身功名傀儡場中物妻子骷髏隊裏人只有君親無答報生生常自祝能仁時年四十九超生時其祖母夢峨嵋老僧而生故幼不茹葷先是有術者言超壽止四十九故爲詩四十九篇至是果符合云

會元不與館選

丁亥會元李人龍字震陽滄洲人歎明末文運之弊力變其格歸于正宗舉第一授定遠令會元不與館選自人龍始

真翰林

馮文毅公溥字易齋山東益都人明崇禎己卯舉人本朝丙戌開科進士丁亥補殿試二甲十一名改庶吉士由編修陞侍讀學士是時聖祖屢幸內閣一日指溥謂諸大學士曰馮溥真翰林也官至大學士

漢翰林習滿語

宛平王文靖公熙字子雍順治四年丁亥登進士年甫二十改庶吉士習滿書拔前列世祖召見宏文院命以滿語奏對大加褒賞尋陞國子監司業復諭閣臣王熙既爲司業恐其荒于滿書可傳諭祭酒姑爾馬忤同署問答皆以滿語勿令間斷甲午命譯書經兼爲滿學士講解本章秋陞洗馬冬召入南苑譯勸善書及大學衍義一日世祖猝至直幄閱熙所譯書諭閣臣稱善久之遂令長直南苑復試滿書第一陞庶子後官至大學士與同榜益都馮溥同鄉寶坻杜立德俱稱一時賢相

題請科場處分則例

黃文僖公機字次辰順治丁亥進士改庶吉士歷任吏禮等部尙書時世祖自江南丁酉後嚴科場積弊凡卷有小疵俱羅大獄機題請科場處分則例俱從寬條聖祖時紳矜以逋賦褫革者不可勝計俱擬解

部勘問。機請就近究治。不必遠解株連。議者或欲罷科目。機力持不可。乃罷制藝。而用策論。機與王熙復以八股發聖賢心傳。請復舊制。上俱從之。機工書法。奉旨書御屏。金箋。書額。俱稱。

社稷臣

李文襄公之芳。由順治丁亥進士。官至文華殿大學士。剛正沉毅。總督浙江時。平定耿逆。不動聲色。以身繫天下之重。使數千里危而復安。古稱社稷臣之芳之謂歟。是科名臣。如湯陰端儋。尙書玉伯勉。霸州郝恭定。尙書杜維訥。皆是也。

殿試不用四六自劉子壯始

先是廷對策。俱用四六舊套。順治初開科。傅以漸首魁天下。亦仍其習。至順治六年己丑科。世祖始臨軒親策。制曰。從古帝王。以天下爲一家。子自入中原以來。滿漢曾無異視。而遠邇百姓。猶未同風。豈滿人尙質。漢人尙文。習俗或不同與。抑音語未通。意見偶殊。畛域尙或未化與。今欲聯滿漢爲一體。使之同心合力。歡然無間。何道而可。要言可行。不用四六舊套。子將親覽焉。子壯對曰。臣聞人君致治。在力行。不在多言。人臣進言。與其文毋寧過質。夫帝王以天下爲一家。則滿漢皆一家也。朝廷雖無異視。而百姓不能不異也。卽滿人漢人。不能不相異也。百姓之所以異視者何也。邊院之外。愚懦之民。見一滿人。則先驚之矣。又有挾之爲重者。以相恐。其實滿人之與漢人。未嘗不愛也。處事未嘗不明。守法未嘗不堅也。居身未嘗不廉也。而小民預有畏怯之意。雖其極有理之事。皆恐不能自直於前。則其勢不能以卒合。而又時當變

革之初。民重其生。是以雖有相愛之誠。而不敢相信。雖無有相凌之意。而先以自怯也。此百姓之所爲異也。滿漢之不能不相異者何也。滿人有開拓之功。其權不得不重。滿人有勤勞之績。其勢不得不隆。漢人雖處尊貴之位。力固不敢相抗。志固不能必行也。其中自專者。未免輕漢人爲善狡。爲朋交。其中自疑者。未免懼滿人之多強之多勢。是以有懷而不能相喻。有才而不能自盡也。此滿漢之相爲異也。今欲去其異而同之。臣謂滿人尙質。以文輔之。漢人尙文。以質輔之。其以文輔之者。設滿學焉。或於國子監。或於教習庶吉。使讀四書。以通其理。觀通鑑綱目。以習其事。限爲歲月以考之。亦可以知奉教之人。卽爲他日奉法之人。又可以察其才之所堪。以爲選授之地。其樸者教之禮數。以知謙讓。通之市易。以知義利。同之好惡。以達其意。通之交遊。以習其情。日漸月積。至于化而相忘矣。其以質輔之者。凡在官。以實事責之。選授之公。於所選之人。參舉多少知之。錢穀之任。於所掌之務。出入清慎知之。司教者以風俗美惡。人才盛衰。察之。典戎者。於民生安擾。盜賊平定。察之。監司以屬吏奉法舉效。當可爲考。有司以士田開墾。民人歸業。爲課。凡在民。以實心責之。如往來。毋以其少文而畏其難近。如事理。毋以其好勝而懼其相侵。如貿易。毋疑其貪狠。而設爲冒欺。如居處。毋厭其鄙固。而多所棄遠。如是。則習俗雖不同。道德同之也。音語雖未通。氣類習之也。義見雖偶殊。義理達之也。一文一質。方將變通古今。轉移造物。而有何不化之畛域哉。抑臣所祈者。願復古日御便殿之制。令大臣如唐虞君臣論道。取內外章奏。面相議訂。諫官仍得於仗下封駁。則上下情通。滿漢道合。中外權均。宰相不僅以奉行爲職。卿貳不僅以署紙爲能。則中心隱微。皆可告語。

而海荒萬里。如在目前。此古和衷之休也。又何遠近百姓之風不可同與。子壯對策既畢。世祖大悅。親定第一甲第一名。授國史院修撰。所言經筵。滿學。教習。屯衛諸大政。悉著令甲。次第舉行之。壬辰分校禮闈。癸巳卒。年四十四。著圯思堂集。

子壯異夢

劉子壯者。世居團風鎮。少穎慧。讀書一目數行下。屬文奇肆。弱冠登崇禎庚午舉人。初登後。夢一人語之曰。爾須朱之弼作房考。方中春榜。及到京師。偶出寓散步。見數童子携書包經其門。一童子最秀出。遂執其手與談。見其書上寫學名朱之弼也。大驚。隨至其家。見其父乃開柴敝主人。因與款曲。將筆硯數事贈之。後遭流寇之亂。屢次不赴春官。及本朝順治六年己丑會試。之弼已爲禮垣分校。得首卷。卽子壯也。

熊劉

熊伯龍。己丑榜眼。與子壯齊名。人稱熊劉。官編修。甲午典試浙江。一榜得狀元三人。乙未鄧之史大成。甲辰歸安之嚴我斯。庚戌德清之蔡啓僊是也。官至祭酒。探花張天植。字次先。秀水人。由編修至太常。轉通政。端午。世祖召入龍舟賜宴。人以爲榮。官至兵侍。

兩次會試俱中一百六十二名

巢震林。字五一。武進人。順治壬辰會試。中一百六十二名。以磨勘革去。乙未會試。復中一百六十二名。毫釐不爽。信有定數也。

初設八旗科舉例

大清會典順治八年六月。禮部議准八旗科舉例。凡遇應考年分。鄉試取中滿洲五十名。蒙古二十名。漢軍五十名。各衙門無頂帶筆帖式。亦准應試。滿洲蒙古識漢字者。繙漢字文一篇。不識漢字者。作滿字文一篇。漢軍文章篇數如漢人例。會試取中滿洲二十五名。蒙古十名。漢軍二十五名。各衙門他赤哈番筆帖式哈番。俱准應試。滿洲蒙古識漢字者。繙漢字文一篇。作文章一篇。不識漢字者。作滿字文二篇。漢軍文章篇數如漢人例。八月。上皇太后尊號。恩詔內一滿洲蒙古漢軍舉人。於順治九年會試。原額取六十名。今加額二十五名。禮部言。今科順天鄉試。取滿洲舉人五十名。蒙古舉人二十名。主考應用滿洲內院禮部官各一員。漢軍舉人五十名。聽漢主考官閱卷。又監生額數。既加三十八名。應增漢房考官二員。至漢軍文字。本年鄉試。明年會試。第一場書義二篇。經義一篇。如未通經者。作書義三篇。二場論一篇。三場策一道。順治十一年鄉試。十二年會試。第一場書義三篇。經義三篇。經義二篇。二場論一篇。判五條。三場策三道。順治十四年鄉試。十五年會試。第一場書義三篇。經義四篇。二場論一篇。表一篇。判五條。三場策五道。詔如所議行。又內三院會同禮部議准。本年順天鄉試。滿洲蒙古生員筆帖式同一榜。漢軍生員筆帖式漢生員同一榜。明年會試殿試。俱照此始。

滿漢進士分二榜

順治元年壬辰會試。分滿漢爲二榜。蒙古入滿洲榜。漢軍入漢人榜。滿榜中賜進士及第。授職修撰。編修。

及二甲出身三甲同出身俱與漢榜同是科滿榜會試中式五十人殿試賜進士及第三人第一甲第一名麻勒吉正黃旗人授修撰第二名折庫納第三名巴清俱鑲藍旗人授編修二甲楊宮等七人三甲賽花等三十人各賜進士出身同出身有差選庶吉士賽花等九人照例立題名碑于國子監考沈椒園廷芳所輯館選錄姓名與題名碑不同吳爾祜題名作吳爾戶威洛洪作魏羅渾朱祖保作宋蘇保包達禮作八達里塔必圖作塔必免蓋國語凡對音字皆可通用也是科漢榜一甲第一名爲無錫鄒忠倚湯文正公斌卽是科進士也乙未科滿榜亦取五十人一甲第一名爲圖爾宸正白旗人自此後滿榜仍停止與蒙古俱漢榜合爲一

壬辰會元除名

順治九年壬辰會元程可則字周量廣東南海人是科首題爲君子有大道二句次參乎吾道一以貫之一章三經正則庶民興磨勘以可則首藝專主用人不合朱註除名大總裁翰林學士胡統虞編修成亮議處後以薦授主事至兵部職方司郎中有詩名爲本朝八家之一八家者王士禎士祿施閏章宋琬陳廷敬沈荃可則也一日早朝士禎嘲之曰趨朝夜永未渠央聽鼓應官有底忙行到前門門未啓轎中端坐喫檳榔後出守廣西桂林府知府卒

瓜子之兆

鄒忠倚字子度無錫人幼遊錢塘禱夢于忠肅祠忠肅授以瓜子一握數之得五十四粒後閒居其夫人